

余聽鴻先生

先生諱景和。字聽鴻。宜興人。父臚卿。邑名諸生。歿時先生纔九齡。母繆嫻詩禮。先生後此能著書。得力於母教也。年十三。從前母兄邵棠之孟河。習業於藥肆。浙行。母詔之曰。人以立品為先。不必讀書。始佳。其誌之勿忘。先生謹諾。會髮匪陷常州。掠去充苦役。展轉得脫。走孟河。至則藥肆無恙。兄猶在馬。相見。哭失聲。遂仍留肆中。暇則手醫宗金鑑。冥心蒐討。無間寒暑。數年。肆主人得格陽症。歷數醫不效。瀕危。先生以附桂療之。語在所著診餘集中。嗣是益刻意治醫。時孟河醫學甲全國。費士源馬省三賈先生諸人。治醫以名山自期。不屑市道。出諸先生之門者。傷寒金匱靈素難經。皆能背誦。先生讀乃益苦。蘭泉先生見之曰。若讀勤矣。然不得師。則事倍功半。蓋從吾游乎。先生大喜。棄所業。委贄於蘭泉先生之門。居三年。為入宜弟子。後應友人之招。赴常熟。愈危症。名大噪。病家敦勤懸壺。衆爭聲惠之。先生亦愛虛山風物。不欲去也。於是始以醫為業。貧人求診。不受酬。且周以錢。值危症。輒忘己事。鎮日與病者周旋。奧味撫存。如保姆。農家居湫隘。先生處之怡如也。常熟先哲季君梅趙惠甫。皆重先生。鄉人至今稱余仙人云。以光緒丁未年病歿。壽六十一。配陳子四。長振恆。次振基。三振元。四渭琴。幼塲。振基振元。皆達於醫。女二。適張適丁。孫二。彥純彥儀。世先生之業。先生晚年。著有傷寒論翼注外科醫案診餘集。並行世。

錄目案醫鴻聽余

關格	一
痿症	五
脹滿	八
水腫	三
溼溫	三
呃逆	五
暑證	五
戰汗	九
欬痰	二
溼痺	二
脫證	三
斑疹	六
厥症	六
吐血	三

熱極似寒	三
熱深厥深	三
虛痞	四
結胸	五
黃疸	五
便血	七
便結	六
癰閉	四
遺精	四
龍陽毒	四
食參目盲	四
胎產	七
經帶	五

余聽鴻醫案

武進徐衡之編集
嘉定姚若琴

關格

琴川趙姓女年十九。面色如常。毫無病容。脈見左弦右弱。余曰。木強土弱。肝木犯胃尅脾。飲食作吐否。其父曰。然。卽進疏肝扶土降逆之劑。明日又至。其父曰。昨日所服之藥。傾吐而盡。余卽細問其病之始末。其父曰。此病有一年半矣。余曰。何不早治。其父曰。已服藥三百餘劑。刻下只能每日飲人乳一杯。已月餘未得更衣。余乃細詢其前服之方。皆進退黃連湯。資液救焚湯。代赭旋覆湯。四磨飲。五汁飲。韭汁牛乳飲。俱已服過。又云不但服藥。而川鬱金磨服已有三斤。沉香磨服亦有四五兩。余曰。今之鬱金。實卽莪朮之子。大破氣血。伽南香雖云理氣。其質是木。有氣無味。二味多服。津液愈虧。胃汁愈枯。藏府日見乾澀。此乃雜藥亂投。大傷津液而成關格也。余細細思之。取大

半夏湯加淡菝蓉懷牛膝。金匱腎氣丸絹包同煎。以取半夏之辛開滑降。甘草人參生津養胃。生蜜甘潤。甘瀾水取其引藥下行。增肉菝蓉之滑潤腸腑。滋膏牛膝之降下而潛虛陽。再以金匱腎氣丸溫動真陽。雲蒸雨施。藉下焦之陽。而布上焦之陰。服後仍傾吐而盡。余頗焦灼。問曰。人乳何以飲。其父曰。一杯作三五次。方能飲盡。惟金匱腎氣丸。乾者三五粒亦能下咽。余曰。得之矣。將原方濃煎。或置雞鳴壺內。終日燉溫。頻頻取服。令病人坐於門前。使其心曠神怡。忘却疾病之憂。將腎氣丸四錢乾者。每次三五粒。用藥汁少些送之。一日夜盡劑。就余復診。余曰。別無他治。仍將蜜作腎氣丸乾嚙。以原方藥汁送之。服三四劑。忽然神氣疲倦。面色轉黃。一月餘未得更衣。忽下燥糞兩尺。臥床不能起矣。舉家驚惶。余曰。下關雖通。上關仍閉。飲食仍不得下。幸而乾者能嚙。尚有一線生機。將腎氣丸四錢。和入蒸飯四兩搗丸。將前方去菝蓉牛膝。遵前法漸漸吞之。後仍前法再加蒸飯四錢照法吞之。數日後胃得

穀氣。食管漸潤。腎氣丸每日加服一錢。漸加至飯三四兩。皆用之。半夏湯吞之。後以飯作丸。用清米飲吞之。一日能進飯丸四兩。再食以乾飯。上格已開。腑氣亦潤。後用潤燥養陰之品。調理三月而愈。所以仲聖之法。用之得當。如鼓應桴。人云仲聖之法。能治傷寒。不能治調理者。門外漢也。

琴川東周墅顧姓。年三十餘。素性好飲縱慾。腎虛則龍火上燔。嘔血盈盆。津液大傷。他醫以涼藥遏之。後年餘。大便秘結。匝月不解。食入即嘔。或早食暮吐。又經他醫投以辛香溫燥。嘔吐更甚。就余寓診。余曰。大吐血後。津液已傷。又經辛香溫燥。更傷其液。肝少血養。木氣上犯則嘔。腸胃乾澀。津不能下降。則腑道不通。故而便堅陰結也。即進進退黃連湯。加菴蓉。枸杞。歸身。白芍。沙苑。兔絲。柏子。仁麻。仁牛膝。肉桂。姜棗等溫潤之品。服四五劑。即能更衣。其嘔亦瘥。再加鹿角霜。魚版膠。又服二十餘劑。乃痊。至今已八年矣。或有發時。服甘溫滋潤藥數劑即愈。此症如專以香燥辛溫。耗燬津液。關格斷難復。

起。汪訥庵曰。關格之症。治以辛溫香燥。雖取快於一時。久之必至於死。爲醫者當如何慎之。

庚午余治琴川孝廉邵君蔓如。生平嗜飲過度。且有便血證。便血甚多。始則飲食漸少。繼則四肢痿軟。後卽飲食不得入。手不能舉。足不能行。邀余診之。詢其顛末。每日只能飲人乳一杯。米粉粥一鍾而已。看前醫之方。皆服芳香溫燥。診脈弦澀而空。舌津燥。余曰。此乃血不養肝。津液乾澀。食管不利。夫格症皆屬津枯。剛燥之劑。亦在所禁。痿屬血少。不能榮養筋絡。多服燥烈芳香。胃汁枯。津液傷。痿症已成。格亦難免。卽進以養血潤燥之品。服五六劑。格症漸開。余思草木柔潤之劑。難生氣血。亦不能入絡。因其好酒。便血太多。後起此症。卽進以血肉有情之品。虎骨鹿骨龜版等膠。牛筋蹄筋鹿筋羊脛骨雞翅及菘蓉魚線膠枸杞歸身巴戟豬脊筋。大隊滋補重劑。服十餘劑。關格大開。漸能飲食。手足痛勢已舒。手略能舉。步稍能移。後卽將此方加羊腎

淡菜共十七味。約四五斤。濃煎收膏。服四五料。步履如常。飲食亦復。手亦能握管矣。古人云。精不足者。補之以味。其言洵不謬也。

痿症

琴川小東門王姓。年約十七八。素有滑洩遺精。兩足痿軟。背駝腰屈。兩手扶杖而行。皮枯肉削。彼云。我有溼氣。已服三妙湯數十劑。罔效。予曰。瘦人以溼爲寶。有溼則肥。無溼則瘦。觀其兩腿。大肉日削。診脈兩尺細軟。難經曰。下損於上。一損損於腎。骨痿不能起於床。精不足者。補之以味。損其腎者益其精。如再進苦燥利溼。陰分愈利。愈虛。兩足不能起矣。進以六味地黃湯。加虎骨魚版鹿筋菴蓉大劑。填下滋陰。服十餘劑。兩足稍健。再將前方加魚線膠。鹿角霜等。服十餘劑。另服虎潛丸。每日五錢。兩足肌肉漸充。步履安穩也。我習醫已三年矣。余卽勸其改業。不必習此小道。夫醫之一業。功少過多。利小任重。有生計者。不必習也。

治痿諸法。方書所載。言語甚爲紛繁。以余思之。用法當簡。惟乾溼二字足矣。如花卉菜蔬。過溼則痿。過燥則痿。人之痿而不振。歸納乾燥二字盡矣。看痿之乾溼。在肉之削與不削。肌膚之枯潤。一目了然。如肉腫而潤。筋脈弛縱。痿而無力。其病在溼。當以利溼祛風燥溼。其肉削肌枯。筋脈拘縮。痿而無力。其病在乾。當養血潤燥舒筋。余治痿症甚多。今憶兩條。未嘗不可爲規則也。治翁府船夥錢姓。至上海。驟然兩足痿軟無力。不能站立。就診於余。診其脈帶濇兼數。按之數更甚。口中臭氣不堪。小便短赤。莖中澀痛。問其上海宿妓否。答曰。住宿兩宵。可曾受溼否。曰。因醉後在船蓬上露臥半夜。即兩足痿弱不能起立。余見其兩足微腫。捫之微熱。余曰。此乃酒溼之熱內蒸。露溼之寒外襲。化熱難出。又房事兩宵。氣脈皆虛。溼毒流注於經絡。即進以葶藶猪苓赤苓澤瀉苡仁木通黃柏牛膝土茯苓丹皮草梢桑皮等服三劑。兩足漸能起立。後以北沙參麥冬石斛苡仁甘草茯苓葶藶牛膝知母黃柏桑皮桑

枝等。再服四五劑。步履如常。此治溼熱流注之痿也。

又治一乾痿。常熱小東門外東倉街。程筠章。自四月寒熱。經他醫治至九月。先以牛蒡豆豉枳殼厚朴等。至夏以藿香正氣之類。至秋以厚朴枳殼赤苓腹皮等。均係燥溼淡滲之品。服百餘劑。以致遍身肌肉削脫。筋脈拘攣。四肢拳縮不能伸。手不能舉。足不能立。十餘日未能飲食。月餘不能更衣。王姓醫仍進以香燥淡滲。後邀余診。見其口唇上吊。齒露舌乾。不能吸烟。烟膏從齒縫中吞之。飲以稀粥。噎而難入。匝月不更衣。衆皆謂不起之症。余笑曰。此症最易治。斷斷不死。衆問故。余曰。精不足者。補之以味。損者益之。燥者潤之。當先用老肥鴨一隻。水海參一斤。豬蹄一斤。三物用大沙罐煨之。糜爛。以布濾去渣滓。吹去油質。將此汁加以蔥姜汁少許。醬酒和好燉溫。隨其量飲之。使其食管腑道潤滑。再論服藥。依法製服飲之。數日。似乎喉間稍爽。能下粥稀。再以大劑虎潛法去鎖陽。服四劑。其熱已平。再立一方。熟地一兩。淡菴

蓉五錢。牛膝三錢。龜版一兩。虎骨五錢。蹄筋五條。麥冬五錢。石斛五錢。陳酒二兩。芝麻五錢。煎濃汁飲之。以鴨肉海參汁助之。服十餘日。大便更燥。矢數尺。胃納漸醒。服至四十天。肌膚潤滑。兩足漸能起立行走。服至百餘劑。胃氣大甦。兩手漸能舉矣。後調理二百餘天。手指仍然無力。尙不能握管作小措。肌肉雖充。肢尙少力。今已七年。尙未復元。如不以大劑滋潤。藉灌漑之功。此症不死何待。服燥藥百餘劑。滋膏竭盡。醫家病家。兩不醒悟。豈非奇聞。

脹滿

朱雲卿。洞庭山人。年三十六七。在琴川老吳市典爲業。有氣從少腹直衝胸膈。腹脹如鼓。堅硬臍突。屢服檳榔枳殼五皮等消導尅伐之品。愈服愈脹。匝月未得更衣。兩足漸腫。小便不爽。面上色澤漸枯。胃氣日憊。欲回籍袖手待斃矣。吾友松筠張君。偕至余寓就診。余曰。脈遲澀而肌膚枯黯。腹硬而堅。不得更衣。此乃衝任足三陰肝脾腎陽虛。陰氣之所結也。衝脈起於氣街。

挾臍而上。任脈起於中極之下。循腹裏。上關元。足三陰之脈。從足走腹。衝脈爲病。氣逆裏急。任脈爲病。男子內結七疝。肝脈爲病。有少腹腫滿。少腹氣衝於上。此乃衝疝之類也。陽氣虛不能運行。陰寒之氣。蟠結於中。結聚不消。况下焦陰氣上升。非溫不納。中宮虛餒。非補不行。投以東洋參白朮鹿膠附桂茴香巴戟菴蓉枸杞兔絲姜棗等溫補滑潤之品。服一劑。脹更甚。余曰。此氣虛不能運藥也。若更他法。則非其治。強其再服一劑。脹益甚。且氣阻不爽。余再強其服一劑。忽然氣從下降。大解堅糞甚多。其腹已鬆。氣歸於少腹角。一塊如杯。余曰。當將此方購二十劑。煎膏緩緩服之。服盡而愈。所以治脹病。當分虛實藏府爲最要。此症若疑實脹。投以破氣攻伐。斷無生理矣。然不能辨之確。斷之的。見投劑不效。卽改絃易轍。有不致債事者乎。故治病以識症爲第一。

常熟西門俞義莊。俞濂洲先生之少君。瑞舒世兄。年二十三。四時正酷

暑邀余診之。腹脹如鼓。足腫臥床。余問其病由。素有便血症。按脈極細。小便短赤。余曰。此乃久痢便血。脾腎兩虛。土敗之症也。觀前醫之方。大約檳榔枳朴五皮香砂苓瀉之類。余曰。此症非大用溫補。助火生土。斷難有效。使其向虞山言子坟上。取黃色泥土百斤。將河水攪渾澄清。煎藥炊茶羹粥。均用此水。若水盡再換泥一石。攪水兩石。用盡再換。取土可補土之義。進參朮附桂補骨脂益智黃芪枸杞巴戟杜仲熟地等大劑。腹上繫繩緊束。服大補藥三劑。以繩驗之。約鬆三指許。後余恐其太補。方中稍加枳殼。所繫之繩。仍緊如故。以此驗之。破氣之藥。一毫不能用也。專以溫補大劑服百餘劑。其脹已消。約用去熟地四五斤。參芪各四五斤。杞朮等稱是。起床後。服金匱腎氣丸。并補劑而痊。至今六年。惟行路常有氣喘耳。下焦之虛。不易填也。

常熟青藜巷吳鑄菴先生。年五十餘。平素有便溏。清晨泄瀉。後腹脹臍突。腰平背滿。囊莖腿足皆腫。兩臂脅肉漸削。余曰。便瀉傷及脾腎。非溫補不

可後進參朮等補劑。服三劑。腹脹仍然。二次邀余診。見其案頭。有臨證指南。醫方集解等書。余曰。閣下知醫。莫非更吾方乎。彼曰。實不相瞞。將方中略加枳朴香砂等味耳。余曰。既然同道。若不依余。斷難取效。余存之方。切不可更動。約服四五十劑。即可痊愈。仍進參朮芩草益智巴戟仙靈脾補骨脂姜棗桂附等。服四五十劑。便溏已止。脹勢全消。至今四年。強健如昔。所以辨虛脹實脹。大約在便溏便堅之間。亦可稍有把握。庶不致見脹即攻伐尅消亂投也。

常熟西弄。少府魏葆欽先生之媳。因喪夫悒鬱。腹大如鼓。腰平背滿臍突。四肢瘦削。臥則不易轉側。余於壬午秋抵琴川。季君梅太史介紹余至魏府診之。面色青而脈弦濇。余曰。弦屬木強。澀爲氣滯。面色青黯。肢瘦腹大。此乃木乘土位。中陽不運。故腹脹硬而肢不脹也。中虛單腹脹症。雖諸醫束手。症尙可挽。以枳朴檳榔等味。治木強脾弱。中虛之症。如誅罰無罪。豈不僨事。

恐正氣難支。急宜理氣疏肝。溫中扶土抑木。進以香砂六君湯。加干姜附子。刺蒺藜桂枝白芍紅棗檀香等。服五六劑。仍然。然終以此方爲主。加減出入。加杜仲益智陳皮等。服四五十劑。腹脹漸鬆。肢肉漸復。服藥百餘劑而愈。再服禹餘糧丸十餘兩。金匱腎氣丸三四十兩。腹中堅硬俱消。其病乃痊。今已十五年。其健如昔。吾師曰。脹病當先分臟脹腑脹。虛脹實脹。有水無水等因。寒涼溫熱。攻補消利。方有把握。若一見脹症。專用枳朴查曲五皮等味。無故攻伐。反傷正氣。每致誤事耳。

常熟東門外顏港橋。老虎灶內。小童年十歲。先因腎囊作脹。常熟俗名鷄臍臟。覓單方服之。延四十日後。肢瘦腹脹。臍突而高。作喘。腎囊脹亮。莖腫轉纒。如螺如索。小便六七日未通。奄奄一息。余診之。思如此危症。難於下手。急進濟生腎氣湯大劑。附桂各一錢。倍車前芩瀉。服兩劑。小便漸通。一日數滴而已。後服之五六劑。小便漸暢。莖亦直而不轉矣。再以原方減輕。服二十

劑。腹脹亦消。惟形瘦不堪。後以參苓白朮散調理而痊。將近十齡之童。前後服桂附各兩餘。所謂小兒純陽一語。亦不可拘執也。

水腫

常熟縣南街麵店內某童。年十六七。冬日墜入河中。貧無衣換。着溼衣。在灶前烘之。溼熱之氣。侵入肌肉。面浮足腫。腹脹色黃。已有三年。友憐其苦。領向余診。余以濟生腎氣湯法。熟地一兩。萸肉二錢。丹皮二錢。淮藥三錢。澤瀉二錢。茯苓三錢。牛膝錢半。車前二錢。附子一錢。肉桂一錢。余給以肉桂一支。重五錢。時正酷暑。人言附桂。恐不相宜。又云。脹病忌補。熱地當去。余曰。此方斷不可改。服六劑。小便甚多。猝然神昏疲倦。人恐其虛脫。余曰。不妨。服六劑。有熟地六兩。一時小便太多。正氣下陷。未必即脫。待其安寐。至明午始甦。而腫熱全消。後服參苓白朮散十餘劑而愈。

溼溫

常熟靈公殿楊府。一小使周姓。無錫人。年十八九。壬午七月間病後。至八月間。又勞碌反覆。發熱面紅。脈沈氣促。有汪姓醫以爲虛陽上脫。服以參附。熱更甚。脈更沈。汗出不止。邀余診之。以脈沈面赤氣促論之。却似戴陽。視其正氣。斷非虛脫。太常楊公曰。虛實惟君一決。余曰。待余再診。方可直決。再診之。面目俱紅。口中氣臭。小便短赤。脈沈滯而模糊不清。余曰。此乃溼溫化熱。被參附阻於氣機。熱鬱不能分洩。逼陰外出。故反汗多氣促。楊公曰。實熱有何據。余曰。仲景試寒熱。在小便之多少赤白。口中氣臭。斷非虛熱。溫涼執持不定。必致僨事。若不用寒涼藥。症必危矣。楊公不能決。余卽書黃柏木通梔皮鬱金苡仁通草苓皮竹葉滑石杏仁藿香。令服之。明日復診。熱退汗止。而神倦。余卽以香砂白朮二陳之類。令服之。楊公曰。昨寒涼。今溫燥。何也。余曰。溼溫症熱去溼存。陽氣卽微。再服涼藥。必轉吐瀉。昨以寒淡滲熱。今以苦溫化溼。服三劑。溼亦退。後服香砂六君五六劑而愈。症非危險。若執持不定。

因循人事。仍用參附。不死何待。

呃逆

常熟慧日寺。傷科劉震揚。始因溼溫發疹。其人體豐溼重。醫進以牛蒡山梔連翹等。已有十餘日。邀余診之。脈來濡滯不揚。舌薄白。神識如蒙。冷汗溼溼不斷。身有紅疹不多。洩少而赤。呃逆頻頻。症勢甚危。余曰。肥人氣滯。溼邪化熱。瀰漫胸中。如雲如霧。充塞募原。神識昏蒙。况呃之一症。有虛實痰氣濕血寒熱之分。不可專言是寒。鄙見看來。上焦氣機阻逆。斷不可拘於丁香柿蒂之法。先立一清輕芳香。先開上焦。佐以降逆洩熱。進以蘇子梗藿香梗通草鬱金沈香屑杏仁茯苓薏仁佩蘭半夏橘皮姜竹茹。另研蘇合香丸汁。頻頻呷之。服後。神氣日清。診七八次。皆進以芳香苦洩淡滲法。而熱退呃平。乃愈。此症若誤疑呃逆爲虛寒。投以溫補立斃。

暑證

暑溫風溫熱病。最忌大汗傷陰。苦溫傷液。溫補助熱。俱可化火。爲害最烈。葉天士曰。溫邪傷液。急則變爲癍厥。緩則變爲虛勞。前輩屢試之言。詢不誣也。余見一某姓子。平素陰虛內熱。是年壬午。君火司天。溫邪極甚。六月間得熱病。琴川有一四時風寒通套之方。豆豉牛蒡山梔厚朴枳殼連翹陳皮。山查半夏赤苓通草蟬衣杏仁之類。熱甚者。加入鮮石斛鮮生地等品。不大便。則加瓜蒌仁元明粉。或加涼膈散兩許。無論四時六氣。皆從此方加減。某醫卽以此方加減進之。然暑必夾溼。燥則化火。涼則溼凝。而甘淡微苦之法。全然不知。以致病人津乾舌絳。脘阻便溏汗多。見其因表致虛。某又進參芪熟地杞子杜仲等溫補之品。不知補則礙氣助熱。聚溼填中。病在垂危。延月餘。邀余診之。脈虛細而芤。舌絳如猪肝。汗出氣促。不得平臥。手指戰振。灼熱津乾不渴。咳嗽痰多。洩瀉。已有緩變虛勞之勢。余曰。此症古人云。不服藥爲中醫。若再服藥危矣。病家曰。此不治之症耶。余曰。非也。暑爲陽邪。溼爲陰邪。

天地之氣也。清邪先中於上。肺先受之。暑溼交阻。蒸化爲熱。用藥若涼。則依溼一面。而化爲寒。必轉便溏痞滿冷汗。用藥若溫。則依暑一面。而化爲火。必轉唇焦舌黑瘵厥等症。故前輩治暑邪之方。最難着筆。要清熱而不礙溼。化溼而不礙熱者。惟有劉河間之天水散。三石湯。吳鞠通之清絡飲。三仁湯。如補而不助熱。不聚溼。則孫真人之生脈散。此諸方皆暑症之要方也。雖然平淡。却能消息於無形之間。以輕能去實也。又以甘涼淡滲。清熱存陰。微苦泄熱等輕劑。服五六十劑之後。病家問曰。若專於清輕之劑。病人正氣恐難支持。亦可服大補否。余曰。人之養生。最冲和者。莫如穀食。既然熱清胃甦。飲食大增。不必拘於溫補。然熱病不服溫補。斷不能收全功。直至十一月。方能服異功散歸脾湯之類而愈。

北門葉姓婦。素有肝氣胸痺。發時腕痛。屢進瓜萋薤白半夏枳實一劑。更衣卽平。屢治屢驗。是年夏杪。此婦雇船下鄉。回城受暑溼而見寒熱。胸腕

阻格作嘔。戴姓醫進以胃苓湯。加藿香蘇梗。此方亦屬不錯。乃服之反甚。邀余診之。脈滯而沈。汗冷作噦。腕中作鞭。按之甚痛而拒按。余視此症。乃熱邪挾溼內陷。爲小陷胸症無疑。進小陷胸湯法一劑。明日更重。診脈仍滯不起。舌灰潤。作噦頻頻。湯液不入。胸中格如兩截。拒按作痛。且讖語言澀不出。汗冷撮空。余竟不解。問病家曰。大便何如。曰。大便已溏數日。余思小陷胸湯已錯。又屬太陰症矣。卽進四逆加人參。余思此症。下利虛痞。作噦肢寒。顯然濁陰上犯。雖不中病。諒亦不遠。卽將此方與服。余歸卽細心思之。因憶溫病條辨下焦篇中。有暑邪深入厥陰。舌灰。心下板實。嘔噦。寒熱下痢。聲音不出。上下拒格者。有椒梅湯法。此症頗切。黃昏病家至寓云。服藥似乎肢溫汗少。神識仍蒙。作噦。便溏不止。余曰。將二次藥煎好。以仲景烏梅丸四錢。將藥汁煎化灌之。服後。胸膈漸開。利止噦平。而能安寐。明午復診。神清言爽。余卽將烏梅丸原方。改作小劑。服兩劑痊愈。

戰汗

常熟旱北門外。孫祠堂茶室婦。始因溫邪未能透徹。延之四十餘日。邀余診之。脈細數鬱於內。着骨始見。肌枯肉削。乾燥灼熱無汗。熱亦不甚。耳聾舌強。言語澀蹇不清。溲少。大便洩瀉如醬色。舌色底絳。而上有烟煤之色。眼白珠淡紅。鼻乾不欲飲。手足痙動。余曰。此乃溫邪深入於裏。汗未透澈。此症當戰汗於骨髓之間。若不戰汗。熱不得泄。陰液燼盡亦死。若戰汗不出亦死。且先以甘涼重劑。養肺胃之陰。以作來日助其戰汗之資。故先進生地麥冬元參石斛梨汁之類一劑。肌膚較潤。泄瀉亦稀。復診。進以大劑復脈湯。加鷄蛋黃二枚調服。生地黃一兩。阿膠三錢。麥冬六錢。生白芍三錢。炙甘草二錢。石斛六錢。生牡蠣一兩。煎濃汁服。余曰。此藥服下。令其安寐。不可擾亂。到天明時。如且冷汗淋漓。手足厥冷。目反口張。遍體冷汗。切勿驚慌呼喚。倘戰不透。亦死症也。若服此藥。汗不止。腹膨無汗。此正不勝邪。戰汗不出。亦不治矣。

日晡服下。至四鼓。果然遍體冷汗。脈靜肢冷。目反不語。舉家因余預囑。故靜以待之。直至日中。汗收神醒。熱退瀉止。後服甘涼養胃。存陰泄熱。數劑而愈。

欬痰

常熟瞿橋倪萬泰染坊何司務。於庚寅除夕得病。寒熱咳嗽痰多。他醫進以豆豉梔子杏仁萸貝蛤壳茆根之類。更劇。一日吐出柔膩之痰數碗。辛卯正月初四。邀余診之。脈緊肌燥無汗。咳喘痰白如膠飴。日吐數碗。脇痛。余曰。此乃寒飲停胸。再服涼藥。卽危矣。進小青龍湯原方。略爲加減。重加桂姜。服三劑。症忽大變。猝然神識如狂。舌紅口燥。起坐不安。卽食生梨兩枚。明晨又邀余去診。症似危險。診之脈緊已鬆。口渴舌紅。又已化火。陽氣已通。可保無虞。後轉服化痰潤肺之劑。仍每日吐柔膩白痰碗餘。十餘日後。再服六君子等和胃藥十餘劑而愈。

溼痺

常熟大市橋王姓。年二十五六。面色青黃。足腫如柱。脹至腰。腰重不能舉。足軟不能行。其父背負而至。余問曰。此症起於何時。答曰。已一年有餘。服藥近二百劑。鮮效。余診其脈。澀滯不利。下體腫脹。身弱不能行。腰重不能舉。余曰。此症雖未見過。揣其情。卽黃帝所謂緩風溼痺也。金匱云。着痺。溼着而不去。腰中如帶五千錢。千金云。脚弱病。總名謂之脚氣。甚則上衝心腹。亦能致命。此症服補劑。往往氣塞而閉者甚多。服表藥而死者。未之有也。斷不可因久病而補之。余進以活命檳榔飲方。橘葉四錢。杉木片一兩。陳酒三兩。童便二兩。水二碗。煎至一碗。調入檳榔末二錢。服後。將被溫覆而臥。遍身汗出如洗。腫退一半。再服一劑。汗後腫卽全退。足漸能步履。復診。更本事杉木散方加味。杉木片五錢。大腹皮二錢。檳榔二錢。橘皮橘葉各二錢。防己二錢。附子四分。酒二兩。童便二兩。服三劑。病痊。其父曰。藥價極廉。不及百文。四劑卽能愈。此一年餘之重症。神乎技矣。余曰。藥貴中病。不論貴賤。在善用之而

已。

脫證

常熟東門外葉泳泰布行一童子。名錦蘭。年約十二三。吐瀉止後。卽就余診。兩尺皆伏。惟寸關脈浮。汗多氣促。余曰。此症大有變局。進以和中分清。芳香淡滲之品。至明日又邀余去診。汗如珠下。面紅目赤。肢厥脈伏。口中要飲井水雪水。煩躁不休。余曰。此症陽已外脫。若認爲熱症。一服寒涼卽死。若畏其死。卽無法矣。病家人曰。聽君所爲。死不怨也。余曰。吾開方後。不可再請他醫。因他醫以余方爲是。死則歸罪於彼。若以余方爲非。而更立一方。死則其罪愈不能辭。症旣危險。死生不如余獨肩其任。卽以乾薑一錢。附片一錢。肉桂八分。豬膽汁一錢。童便二兩。三物先煎。將汁濾清。和入胆汁童便。沸一二次冷服。此症本可用白通四逆。加人尿豬胆汁爲是。因症已危險。故去參草之甘緩。恐其奪薑附之功。加以肉桂之辛。如猛將加以旗鼓。萬軍之中。以

奪敵幟。不料時已在晡。胆汁童便。俱無覓處。病家先以薑附桂三味煎而飲之。欲將胆汁童便明晨再飲。余聞而大駭。卽送字與其父曰。薑附桂陽藥。走而不收。一誤猶可。胆汁童便陰藥。守而不走。再誤不可。一服卽死。明晨速卽將原方照服。或可挽回萬一。明晨果照方服一劑。至午。余又去診之。汗止口渴亦止。面目紅色亦退。脈細如絲而已見。余曰。脈已微續。可無慮矣。卽進四逆加人參人尿再一劑。而病霍然。亦快事也。

吾幼時在孟河天寶堂藥舖。曹煥樹先生之門下習業。其弟魯峯素有咯血症。是年十月。忽起寒熱。頭痛身疼。治以桂枝葛根汗之。寒熱已盡。漸能飲食。停一日。忽然面紅。汗出如珠。神靜脈浮而無力。卽請馬培之先生診之。服藥依然。至晚汗出更甚。莫可爲計。至二更。余看醫宗金鑑。少陰戴陽一條。卽謂煥樹先生曰。魯峯叔之病。與戴陽相合。急宜引火歸元。煥樹恍然悟曰。此陽脫症也。非溫納不可。因其素昔吐血。最懼陽藥。故畏縮而不敢專用。倘

一差失。殺吾弟矣。余曰。陽無陰不斂。當陰陽並顧。與其不治而死。不如含藥而亡。卽以熟地四兩。黨參四兩。黃芪四兩。附子三錢。肉桂三錢。煎汁。加以童便三兩。分三服。先進一服。靜待半時。無所變。再服亦然。三服已盡。汗仍不收。面赤不退。不寐不煩不脹。後治法已亂。曰。旣能受補而無他變者。恐病重藥輕故也。再濃煎高麗參二兩服之。又不脹。再以紫河車一具。東洋參二兩。煎濃汁服之。約一時許。汗收。面紅漸退而安寐。至明日始醒。宛如無恙。

丹陽貢贊溪在琴關豆腐店。始以溫邪。有王姓醫專以牛蒡豆豉柴胡青蒿等。已服十餘劑。陰液已盡。陽氣欲脫。狂躁咬人。神識昏憤。瘡厥皆至。舌黑而縮。牙緊不開。病已陰絕陽亡。余卽進以復脈法。去薑桂。加鷄蛋黃大劑灌之。不料明晨。反目瞪口張。面青肉僵。脈沉而汗出如珠。四肢厥冷。余曰。陰回戰汗。陽不能支。欲脫矣。不必診脈。先炊鑪燃炭。急以桂枝龍骨牡蠣救逆法大劑。高麗參三錢。白芍三錢。甘草一錢。龍骨四錢。牡蠣一兩。淮小麥一兩。

紅棗三錢。茯神二錢。煎之。先灌以粥湯。含不能嚥。卽將藥煎沸灌之。稍能嚥。緩緩盡劑。不料至晡汗收。而遍體灼熱。狂躁昏厥。舌黑津枯。余曰。陽回則陰液又不能支矣。仍進復脈去薑桂法。生地一兩。阿膠三錢。麥冬五錢。白芍三錢。炙草一錢。麻仁四錢。鷄蛋黃二枚。服後至明晨。依然汗冷肢厥脈伏。目瞪口張不言語。余曰。陰回則陽氣又欲脫矣。仍服前方桂枝救逆湯。至晡依然。舌黑短縮。脈數灼熱。仍用復脈去薑桂法。如是者三日。症勢方定。此症陰脫救陰。陽脫救陽。服藥早溫暮涼。若護陰和陽並用。亦屬難救。故不得不分治也。後服甘涼養胃二十餘劑而愈。

同道徐賓之。金陵人。住常熟西門。始而寒熱。繼則下痢紅白。三四日。後重不爽。小便少而澀。自服藥數劑。不效。邀余治之。舌面白。舌心舌邊俱剝而紅燥。脈來滯而不揚。進以胃苓湯意。理氣而洩溼熱。一劑。洩澀後重俱爽。紅積止而見薄糞。猝然遍體汗出如珠。自寅至酉。而起坐言語飲食。一如平人。

惟大便溏薄。日瀉二三次。並不後重。自戌至寅。四時中煩躁汗多。額與指尖均冷。撮空嚙語。喜怒之狀不一。或以爲祟。余曰。此乃陽脫之症。躁而不煩。是陽氣虛竭。卽以附子理中合桂枝。加龍骨牡蠣法。急守中陽以固表陽。人參三錢。於朮四錢。附子一錢。白芍一錢。桂枝二錢。龍骨三錢。牡蠣一兩。炙草一錢。乾薑一錢。紅棗五枚。服之。入夜仍拈衣摸床。嚙語汗出。明日原方再加重三成。加五味子五分。一服後。汗收神清。陽回痢止。飲食漸進。停服六七日。後服亂方。黃芩三錢。白芍三錢。服兩劑。仍煩躁不休。冷汗淋漓。大便水瀉。遍體如冰。再服扶陽固表。已無救矣。噫。生死雖曰天命。豈非人事。醫究有理可評。黃芩苦寒。白芍泄脾。旣自爲醫。反服亂方。其死宜哉。

斑疹

常熟大河鎮道士王少堂。六月初。偕妻回里。十四日起寒熱。徧體紅疹滿布。周姓醫進以辛涼解肌之方。服後病增。至十七。病更劇。其岳母邀余診

之脈極細而微。重按至骨。微見數象。神識頗清。遍體乾燥。身無點汗。舌絳無津。而又不渴。言語輕微。躁不能寐。紅斑密布。無空隙之處。余思此乃正虛邪陷之陰斑也。余曰。初十晚到家。逐日所作何事。試一一述之。曰。十一至十三。做法事。十四日懺事畢。結帳後。當夜卽熱。余曰。再去問之。初十有房事否。答言有之。初十日酷暑。坐船數十里。外風襲表。暑熱偏蒸。至夜慾後。氣脈皆虛。熱邪卽乘虛內伏。加之十一至十三。身爲法官。終日厚衣。汗出不止。汗多則外陽已虛。津液亦涸。腠理空豁。又高叫勅令。中氣亦虛。熱邪易入。故見寒熱。又被寒涼之藥。遏其陽氣。故內熱雖甚。無陽氣蒸動。無津液化汗出表。若再服寒涼。表陽愈虛。熱陷更深。陰斑無疑矣。用仲景桂枝湯。加乾薑人參。重用甘草服後。再飲以米湯。余思汗多則陽弱陰傷。以桂枝湯和其表。以乾薑合桂枝護其中陽。假甘草之多甘。合米飲之穀氣。甘淡以助其胃津。得乾薑之熱。蒸動其胃津以上升。又賴桂枝之力。推之出表。若得汗出。則中陽動而表

陽和內伏之邪。亦可由外表而發。待其煩躁狂叫。或奔走感垣。方爲佳兆。切不可與以涼藥。恐火鬱不能外達也。如服此藥後。仍然不變。則難治矣。服藥後。明午果然神識漸狂。聲高而起坐不安。渴已能飲。病家驚惶。飲以蔗漿一碗。依舊靜臥。聲微脈細。至二鼓。余至其家。問之曰。今午漸狂。聲高渴飲。不料服蔗汁後。依然如故。余曰。正欲其陰症轉陽。由裏出表。陽回而煩。方爲佳兆。又爲寒涼所遏。事屬周折。仍從原方。加臺參鬚服之。明午又見煩躁能飲。以溫水飲之。汗出脈起矣。再進以甘涼之品。生胃陰而洩熱助汗。託之外出。汗透而神靜安寐。脈亦轉和緩。能思飲食。余曰。汗後肌潤。脈和思食。正能勝邪。病有轉機矣。陽回以養陰爲要。進以生脈法。加甘涼鹹寒之品。數劑而痊。

厥症

常熟星橋石姓嫗。晨食油條一支。麻糰一枚。猝然腕中絞痛如刀刺。肢厥脈伏。汗冷神昏。余診之曰。食阻賁門。不得入胃。陰陽之氣。阻隔不通。清陽

不能上升。濁陰不能下降。故揮霍撩亂。窒塞於中。宜用吐法。以通其陽。用生菜菔子三錢。藜蘆一錢。橘紅一錢。炒鹽五分。煎之。飲後以雞羽探喉吐之。再以炒鹽湯飲之。吐二三次。痛止肢溫。厥回汗收。惟噁心一夜。乾嘔不已。余曰。多嘔。胃氣上逆。不能下降。以烏梅丸三錢煎化服之。即平。後服橘半六君子三四劑而愈。夫初食之厥。以吐爲近路。其陽可通。若以枳實檳榔等消食攻下。其氣更祕。危矣。

常熟大東門陶姓嫗。暮年傷子。肝氣久鬱。又因有一人抵賴其子賒出之賬。兩相執持。陶姓嫗猝然跌倒。氣息全無。急邀余診。脈來沉伏。目上反。口鼻之間。呼吸氣息全無。手足厥冷。其勢已危。余曰。此乃肝鬱氣祕。痰阻靈竅。藥不得入。惟用至寶丹蘇合香丸各一粒。用竹瀝。薑汁。菖蒲汁。藜蘆煎汁一杯。將諸汁和入灌之。以雞羽三四支探喉。吐出白膩痰甚多。氣息稍通。片刻後。又氣息全無。再飲再探再吐。如是五七次。痰雖多而氣仍不轉。余疲甚。直

至五更。氣漸轉而能呼吸。天明已能言語。咽痛三四日。調理而愈。余思木鬱則達之。吐卽達之之意也。知此症不用吐法。去其痰。通其陽。而能救者。吾不信也。又有百歲坊朱姓。因口角動怒。猝然昏厥不語。脈伏肢冷。呼吸不通。余卽用炒鹽湯。用雞羽探吐。一哭卽醒。醒則大哭不止。此鬱極則發之也。如天地鬱極。則雷霆奮發之義。余見肝厥、食厥、氣厥等症。惟有吐爲最速耳。所以吐之一法。不可棄而不用也。

吐血

常熟大東門外。吾友謝蔭庭。辛卯六月間。忽大吐血。每日約有碗餘。半月不止。某醫進以犀角地黃湯。加羚羊角川斛生地山梔大涼之劑。罔効。半月以來。已有氣隨血脫之狀。飲以井水亦不止。是夕三鼓。邀余診之。脈來沉細。目瞑聲低。言語輕微。肢冷汗冷。面紅煩躁。欲寐不能寐。余曰。事急矣。氣隨血脫。陽隨陰脫。速宜引陽入陰。引氣納腎。先將陳酒十斤。煮熱。浸其兩足。兩

時許。再以生附子錢半。元寸五釐。葶藶子肉七粒。搗如泥。貼左足心湧泉穴。立方以中生地一兩。元參四錢。麥冬四錢。蒲黃炭二錢。阿膠四錢。生龜版一兩。石斛六錢。生牡蠣一兩。生石決一兩。懷牛膝二錢。茜草炭二錢。煎好。再以鮮柏葉鮮荷葉搗爛絞汁。入童便一茶杯。或秋石一錢。化水同沖。一氣盡服之。血卽止。後服沙參麥冬梨藕石斛甘涼養胃數劑而愈。其友問余曰。前醫進犀角羚羊角生地石斛等。可謂寒矣。何以半月不能止其血。今方服之卽止。何也。余曰。實火宜涼。虛火宜補。此乃肝陽挾龍雷之火上騰。况吐血已多。陽隨陰脫。下焦之陽。不安其位。方書云。在上者當導之使下。陳酒附子是也。鹹可下引。介可潛陽。童便阿膠龜版牡蠣石決是也。甘涼泄熱存陰。生地麥冬元參石斛是也。清血絡。引血歸經而止血。鮮柏葉荷葉汁是也。若專服寒涼。是沸油中潑水。激之使怒。豈能望其潛降乎。

熱極似寒

夫熱極似寒之症。最難辨別。余診同鄉趙惠甫先生之孫卓士。是年九月間。忽起嘔瀉。邀余診之。進以芳香理氣。淡以分泄。至明日舌苔白而轉紅。脈滯而轉滑。嘔吐已止。再進以辛涼甘淡。存陰泄熱。至黃昏忽然發狂。持刀殺人。至明日。闔家無策。余曰。熱透於外。非瀉不可。卽進以三黃石膏法。黃連三錢。黃芩五錢。黃柏三錢。大黃二兩。石膏二兩。梔子五錢。淡豆豉五錢。煎濃汁兩大碗。余曰。多備而少飲。緩緩作數次服之。服一杯。卽瀉稀糞。又服一盃。又瀉稀糞。連服四盃。連瀉四次。神識稍倦。狂躁略減。藥已盡過半矣。扶之使睡。嚙語不休。如癡如狂。卽進以存陰清熱之劑。生牡蠣四兩。元參二兩。麥冬二兩。細生地二兩。金石斛二兩。鮮竹芯一兩。石膏二兩。竹瀝二兩。鮮沙參四兩。大劑灌之。卽能安寐。明日醒。仍嚙語。神識或渾或清。後每日服竹葉石膏湯一劑。西洋參錢半。麥冬五錢。石膏一兩。鮮竹葉四錢。薑半夏錢半。生甘草一錢。知母三錢。粳米二兩。此方共服二十餘劑。而神氣亦清。嚙語亦止。此症

共服石膏二十餘兩而愈。

熱深厥深

常熟大東門龐家弄顏姓。因失業後。室如懸磬。有病不能服藥。延六七日。邀余診之。脈沉如無。四肢厥冷。無汗。神識昏蒙。嚙語撮空。遍體如冰。惟舌底絳而焦黑。乾燥無津。余曰。此乃熱深厥深。陽極似陰。熱極似寒也。當時卽進以銀花露一斤。再進以大劑白虎湯。加犀角生地人中黃煎好。調服至寶丹紫雪丹。罔效。明日再飲以銀花露二斤。仍服原方。犀角八分。生地一兩。石膏八錢。知母二錢。生草一錢。人中黃二錢。粳米湯代水。調至寶丹一粒。紫雪丹五分。服兩劑如故。余思既是熱深厥深。有此兩劑。亦當厥回。如果看錯。寒厥服此兩劑。無有不死。何以不變不動。正令人不解。至明日復診。神識已清。肢體皆溫。汗出淋漓。問其母曰。昨日服何藥。曰。昨日服黃霉天所積冷水五大碗。卽時汗出厥回。神清疹透。余曰。何以能知服涼水。可以厥回。其母曰。昔

時先伯爲醫。每晚談及是年熱症大行。服白虎湯石斛鮮生地等。往往不效。甚至服雪水方解。吾見先生服以銀花露三斤。大劑涼藥一劑。如果不對。宜卽死。今無變動者。必係病重藥輕。吾故斗膽以黃霉水飲之。諒可無虞。誰知竟卽時轉機。噫。余結藥資數千。不若其母黃霉水數碗也。

虛痞

常熟大步道巷余姓。年五十餘。素嗜洋煙。時正酷暑。忽嘔瀉交作。邀余診之。進以胃苓湯。加藿香半夏。明日嘔瀉均止。脈靜身涼。毫無所苦。惟神倦好寐。腕中堅硬。按之作痛拒按。病家以爲病愈。余曰。病入陰臟。微見乾噦。卽進大劑附子理中湯。加生薑之法。黨參五錢。白朮二錢。乾薑一錢。附子八分。炙草五分。薑汁沖服一劑。覺腕中稍舒。再服一劑。而噦亦止。腕中已舒。吾友問曰。腕中拒按。何以反進參朮。實所未解。余曰。吸烟之人。素體本弱。又經大吐大瀉。斷無食滯內停。其腕中堅硬者。乃中虛濁陰蟠踞。虛痞於上也。霍亂

之後。太陰必虛。法用理中。吐者加生薑。腹滿加附子。腹痛加人參。故輕用朮而加附子。人參生薑。俾陽氣充足。濁陰自散。噦可止而痞滿自除。斷無大吐大瀉之後。而有實結胸者。

結胸

泰興太平洲王姓婦。始而發熱不甚。脈來浮數。舌苔薄白。因其初熱。投以二陳蘇葉等。其舌卽紅而燥。改投川貝桑葉等。其舌又白。吾師蘭泉見其舌質易變。曰。此症大有變端。使其另請高名。王姓以爲病無所苦。起居如常。諒無大患。後延一屠姓醫診之。以爲氣血兩虛。卽服補中益氣兩三劑。愈服愈危。至六七劑。卽奄奄一息。脈伏氣絕。時正酷暑。已備入木。吾師曰。王氏與吾世交。何忍袖手。卽往視之。見病人仰臥正寢。梳頭換衣。備入木矣。吾師偕余細看。面不變色。目睛上反。唇色尙紅。其形似未至死。後將薄子一張。蓋其口鼻。又不見鼓動。氣息已絕。按脈亦絕。吾師左右躊躇。曰。未有面色不變。手

足尙溫而死者。後再按其足上太衝太谿。其脈尙存。曰。未有見足脈尙存。而手脈已絕者。必另有別情。卽將其衣解開。按其腕中。石硬而板。重力按之。見病人眉間皮肉微動。似有痛苦之狀。吾師曰。得矣。此乃大結胸症也。非水非痰。是補藥與熱邪博結而成。醫書所未載也。卽書大黃一兩。厚朴三錢。枳實三錢。萊菔子一兩。芒硝三錢。瓜蒌皮一兩。先煎枳朴萊蒌。後納大黃瀘汁。再納芒硝瀘清。將病人牙關撬開。用竹箸兩隻。插入齒中。將藥汁漸漸灌入。自午至戌。方能盡劑。至四更時。病人已有氣息。至天明。稍能言語。忽覺腹中大痛。吾師曰。病至少腹矣。當服原方再半劑。腹大痛不堪。下燥矢三十餘枚。而痛卽止。後調以甘涼養胃而起。

黃疸

陰陽黃疸。雖云難分。然細心辨之。最易分別。陰黃色淡黃而泛青。脈細肢倦。口淡舌白。小溲雖黃。而色不甚赤。陽黃如橘子色。脈實身熱。舌底稍絳。

苔膩黃厚。面黃溲赤。雖諸疸皆從溼熱始。久則皆變爲寒溼。陰黃亦熱去溼存。陽微之意也。惟女勞疸治法看法俱異耳。又有肝氣鬱則脾土受制。肝火與脾溼。爲熱爲疸。又非茵陳薑附梔子大黃可治。此又在調理法中矣。余同窗鄒端生患黃疸日久。孟河諸前輩始從溼熱治之。進以黃柏茵陳四苓之類。不効。余適有事至孟河。診之。脈細。色淡黃而青。舌白口淡。進以薑附茵陳五苓合香燥之品。數劑而愈。此余未習醫之時也。後有茶室夥。黃疸三年。亦以前法服三十劑而愈。有肝鬱黃疸。忽然嘔吐發熱。遍體痠痛。熱退則面目俱黃。此宜從疏肝理氣。利溼健脾自愈。又不可用溫熱也。又有脾虛氣弱。面目淡黃。用參苓白朮等。服十餘劑自愈。

便血

常熟旱北門李姓婦。始以洩瀉鮮紅血。顧姓醫進以白頭翁湯。服後洞瀉不止。純血無度。邀余診之。脈沉欲絕。冷汗淋漓。舌灰潤。色如煙煤。肢冷畏

熱欲飲不能飲。言語或蒙或清。余曰。下痢純血。議白頭翁湯。亦未嘗不是。然厥陰下痢純血。身必發熱。太陰溼聚下痢純血。身必發寒。太陰爲至陰溼土。非溫燥不宜。兼之淡以滲溼爲是。擬胃苓湯。加查炭炒黑乾薑一劑。尙未回陽。而神識稍清。再進白朮二錢。猪苓二錢。赤苓二錢。炒薏仁四錢。查炭三錢。澤瀉二錢。桂枝一錢。炮薑五分。藿香一錢。薏仁五分。荷葉蒂三枚。薑棗服之。洩瀉已止。痢血亦停。漸漸肢溫汗收。神識亦清。後將原方更改。服二三劑而愈。

便結

太倉沙頭鎮陳厚卿。爲人儉樸篤實。足不出戶。身體肥胖。是年秋。覺神疲肢倦。胃納漸減。平昔可食飯三碗。逐漸減至碗許。延醫治之。進以胃苓湯。平胃散。香砂枳朮之類。後邀支塘邵聿修先生以爲胸痺。進薤白瓜蒌等。不效。後又延直塘任雨人先生。進以參苓白朮等。亦無效。四十餘日。未得更衣。

二十餘日未食。脈見歇止。兩人曰：病久脈見結代。五日內當危。舉家驚惶。吾友胡少田。卽厚卿妹丈也。邀余去診之。余見病人毫無所苦。惟脈三息一止。四息一止。而不食不便。余曰：人之欲死。其身中陽氣必有一條去路。或氣促大汗。或下痢不休。或神昏陷塌。今病人一無所苦。五日之危。余實不解。脈之結代。以鄙見論之。係服燥藥淡滲之品太多。腸胃枯澀。二十餘日未食。四十餘日未便。無穀氣以生血脈。血脈乾澀。不能流利。故脈見代結也。未必竟爲死症。余立一方。以附子理中合建中法。通陽布陰。滑利腸胃。黨參五錢。於朮四錢。炙草一錢。乾薑八分。附子四分。桂枝五分。當歸四錢。白芍三錢。淡萸蓉五錢。枸杞子四錢。飴糖五錢。紅棗五枚。鹿角霜五錢。傍人見方。譁然曰：此方非食三碗飯者。不能服此藥。且四十餘日未大便。火氣熱結。再服桂薑附。是益其燥也。余曰：因其不能食。自然要服補藥。因其不得大便。自然要服熱藥。如能食飯。本不要服補藥。能大便。本不要服熱藥。藥所以治病也。豈有能食

能便之人。而妄服藥者乎。人皆以余爲妄言。余曰。余在此。候其服藥。如有差失。自任其咎。與他人何涉。衆始不言。照方服後。稍能食稀粥。傍人曰。昨日之方太險。宜略改輕。余諾之。將原方桂枝易肉桂。鹿角霜易毛角片。黨參換老山高麗參。衆人閱方曰。不但不改輕。且反改重。七言八語。余甚厭之。曰。延醫治病。其權在醫。傍人何得多言掣肘。又服兩劑。再送半硫丸二錢。已覺腹痛。大便稀水淋漓。三日夜。共下殭硬燥屎四十餘節。每節二三寸。以參附湯助之。大便之後。服歸脾湯而愈。

常熟西門虹橋葉姓婦。正月間血崩。經蔡潤甫先生服以參芪等補劑。而崩止。余於二月間到琴。邀余診之。胸腹不舒。胃呆納減。余以異功散。加香砂香附等進之。胸膈已舒。胃氣亦甦。飲食如常矣。有四十餘日未得更衣。是日肛中猝然大痛如刀刺。三日呼號不絕。精神困頓。有某醫生謂生臟毒肛癰之類。恐大腸內潰。後邀余診。余曰。燥屎下迫。肛小而不得出。卽進枸杞子

菘蓉當歸麻仁柏子仁黨參陳酒白蜜之類大劑飲之。明晨出燥屎三枚。痛勢稍減。後兩日肛中大痛。汗冷肢厥。勢更危險。他醫以爲肛中潰裂。余曰。如果肛中潰裂。何以不下膿血。經曰。清陽出上竅。濁陰出下竅。此乃清氣與濁氣團聚於下。直腸填實。燥屎迫於肛門。不得出也。當升其清氣。使清陽之氣上升。則腸中之氣。可以展舒。而津液可以下布。蜜煎胆汁雖潤。亦不能使上焦津液。布於下焦。進以大劑補中益氣湯。加菘蓉杞子。煎濃汁兩碗服之。又下巨糞如臂。並燥屎甚多。肛中痛已霍然。後服參苓白朮散十餘劑而愈。

癰秘

常熟大河鎮李姓婦。孀居有年。年四十餘。素體豐肥。前爲爭產事。以致成訟。鬱怒傷肝。後卽少腹膨脹。左側更甚。小便三日不通。某醫進以五苓導赤等法。俱無效。就余寓診。余曰。此乃肝氣鬱結。氣滯不化。厥陰之脈。繞於陰器。繫於延孔。專於利水無益。疏肝理氣。自然可通。立方用川棟子三錢。青皮

二錢。廣木香五分。香附二錢。鬱金二錢。橘皮錢半。官桂五分。葱管三尺。濃汁送下。通關丸三錢。一劑即通。明日來寓。更方而去。

常熟西鄉大市橋宗福湖。小便不通。延醫治之。不外五苓導赤通草滑石之類。無效。已十三日。未能小便。少腹高硬作痛。汗出氣促。少腹按之石硬。余進通關法。加地黃。重用肉桂。一劑而通。洩仍未暢。少腹兩傍仍硬。臍下中間三指闊已軟。余曰。此陽氣未得運化也。進以濟生腎氣湯大劑。少腹以葱薑水薰洗。三日洩暢如前。

遺精

老吳市陸少雲。遺精。三四日一次。已有三年。養陰固攝。俱罔效。余診之。脈細肢倦。神疲形寒。曰。初起之遺。在相火不靜。日久之遺。在氣虛不固。而龍骨牡蠣之固攝。但能固其精。未能固其氣。治其病。當固其氣於無形之中。進以萆菜子二錢。杞子二錢。菟絲子三錢。黨參三錢。於朮二錢。鹿角霜五錢。桑

螺蛸三錢。黃芪三錢。仙靈脾錢半。巴戟肉二錢。炙草一錢。紅棗五枚。煨薑兩片。服三劑。覺身體輕健。四肢漸溫。胃氣亦旺。服至十劑。則遺精已止矣。

龍陽毒

富貴之人。廣置姬妾。尙恐縱慾傷生。嬖優宿娼。乃正人之所唾棄。往往有富貴之軀。媾合下賤之質。或中毒而虧體辱親。或絕嗣而耗財傷命。茫茫長夜。終古不旦。余實不解。吾師曰。孟河有某巨富。年逾六旬。喜漁男色。有一優伶。善於逢迎。嬖而狎之。不知此優廣交多人。蘊毒已深。京諺所謂吹塘灰者。其毒氣竄入溺孔中。中毒尤甚。後數日。忽然寒熱腹痛。少腹起青筋一條。直衝胸膈。約闊半寸。手不能按。體不能臍曲。日夜疼痛不休。孟河諸先輩治之無效。再延常州法懷風先生治之。亦不效。諸醫束手無策。卽以千金聘丹徒王九峯先生。斯時九峯寓廣陵。渡江到孟。諸醫羣集。九峯診之。謂某富翁曰。君年近古稀。猶舉動如此。何將高年有用之軀。自暴自棄。傷之於非命。

也。衆咸不解。請問何症。九峯笑曰。數言之中。病原在內矣。使其自言可也。此老羞澀不言。九峯曰。此症是中龍陽妬精毒也。夫龍陽之毒。與妓女不同。女之前陰。時時小便。况淋帶信水。出多入少。雖有毒不能久蘊於中。且女氣屬陰。陰氣善伏而下流。卽中妓女之毒。不過淋濁橫痃下疳等症而已。少服清利之藥。當時可去。卽當時不發。伏於腎臟。至一二年化火。隨督脈上昇巔頂。腦髓熱。天庭潰。鼻梁陷塌。治之合法。亦不至傷命。若中龍陽之毒。甚於妓女。男子體質屬陽。二陽相并。雖不中毒。往往損目。後庭一日一便。啓閉有時。火毒內蘊。毫無泄路。久鬱如爐。以剛濟剛。以火濟火。陽者喜竄喜升。毒從肛中射出。直入莖中。如中毒矢。從衝任脈中。直衝於上。絡中流利之氣血。阻塞不通。氣不通則痛。血不通則黑。諸醫問曰。何以治之。九峯曰。高者抑之。塞者通之。實者損之。實者損之。無須多藥。祇以生大黃四兩。用水煎兩沸。絞汁服之。卽愈。某翁因膏梁之體。服大黃。恐有虛脫之慮。諸醫議論不一。法懷風先生

曰以一二兩加酒煎服。大勢不妨。以一兩用酒煎服。毫無動靜。明日九峯欲回。某翁曰。病未治痊。先生何以即回。九峯曰。不服吾藥。請吾何爲。既請吾治。當服吾藥。仍用大黃四兩。九峯親視。依法煎好。曰。求吾治病。君欲命也。吾兩人素無仇隙。斷不致君於死地。強服之。服盡。即下黑血甚多。下一次。則黑筋下數寸。下數次。黑筋方消。而痛亦止。下紫黑血半便桶。翁已神疲力倦。飲以米粥止之。即欲回揚州。某翁留其調理。九峯曰。君雖允吾五十金一日。然家中門診。每日百餘號。就診者舟輿車馬之費。甚爲浩繁。再留。他人費用不少矣。薦法懷風先生調理之可也。臨行有一巢姓。滿面起黑斑。面色黧黑。求診焉。九峯看前方用六味地黃湯。即將前方加肉桂一錢。服百劑。黑色可退。此腎水上泛之症也。問巢姓曰。此方爲誰所書。曰。馬省三先生也。九峯曰。省三頗有心得。後日醫道不在吾下。果服百劑愈。省三者。即培之先生之祖也。至老年果醫道大行。及今數世。尙盛而未艾也。

參食日盲

國家無事。不可論兵。人身無病。不可論藥。一載動兵。十載不平。一日服藥。十日不復。治國保身。俱一貫也。余幼在孟河。見有服參誤事者。今誌之。以昭後戒。有一廣東鄭姓。在申營業。將上好人參二兩。用老鴨一隻。洗淨。以人參二兩。納鴨腹中。煮而食之。五日後。覺目光模糊。十日後。卽兩目青盲。不能視物。就診費伯雄先生。述其緣因。曰。五臟六腑之精。上輸於目。因食參太多。氣機遏塞。清氣不能上蒸。精氣不能上注。故盲也。內經云。益者損之。時正在仲秋。孟城青皮梨甚多。伯庸先生曰。不須服藥。每日服梨汁一碗。使大便每日利二三次。服十餘日。兩目見物。至一月。兩目復元。能察秋毫矣。治法雖極平淡。非伯庸先生做不到。余後治常熟北鄉某。年約十六七。體本豐盈。父母恐其讀書辛苦。兌人參兩餘。服後。其童忽變癡狀。所讀之書。俱不能記憶。余診之。脈弦實而滑。問其言。但微笑而已。面白體肥。不知何病。其父細述服參

情由。余曰。能容各物者。其氣必虛。其體本實。再充而益之。氣有餘。卽是火。煎熬津液爲痰。清竅充塞不靈。卽用化痰清熱之品。以損其氣。而其補自消。進以羚羊、川貝、竹黃、竹瀝、膽星、山梔、菖蒲、遠志、連翹、白金丸之類。再飲以蔗漿梨汁等。服數十劑。神氣日清。讀書亦能記憶。然神情應對。總不若未服參前之玲瓏也。噫。愛之適以害之。爲父母者。不亦難哉。又顧吉卿。子自小在李軍門長樂處。亦多服補藥。至十六七歲。知識尙未大開。亦多服補劑之害也。又一人久瘡。脾虛足腫。服高麗參一兩。當夜卽斃。此脾弱不勝補也。又一女子發瘡。口渴索飲。適有桂元參湯。卽取半碗與飲。明日卽斃。此皆補藥之害也。故藥能中病。大黃爲聖劑。藥不中病。人參亦鳩毒。服藥者可不慎乎。

胎產

常熟寺前街李吉甫先生夫人。妊娠七月。痢下紅白。他醫治以利溼清熱分消。痢更甚。腸滑後重。一日夜百餘度。裴菊村前輩診之。意欲治以補中

益氣湯。恐升提胎元。欲用溫補。又恐胎前忌熱。左右躊躇。邀余合診。脈滑利而少力。腹中氣機溼滯。已通舌絳滑無苔。頭眩耳鳴。虛熱。余曰。治病不在胎前產後。有病則病當之。內經云。陷者舉之。當用升提。脫者固之。當用酸澀。若再用通套利溼之方。恐胎元滑脫矣。擬補中益氣法。重用參朮。輕用升柴。再以木瓜肉果煨薑。升提溫瀆。服數劑。略稀。余曰。滑脫太甚。非堵截之法不可。卽以參附湯調赤石脂末。仍服前方。見其舌紅漸轉白。舌燥轉潤。余曰。清陽已經上升。而能布津於上矣。痢勢漸減。再以五味子木瓜乾薑等研末。和赤石脂飯糊爲丸。每日用附子一錢。高麗參三錢。煎汁送丸四錢。服藥三十餘劑。每日痢下仍有十餘次。胃氣亦甦。分娩時。母子俱全。然痢尚有六七次。再服異功參苓白朮等收功。

常熟長田岸某姓婦。妊娠四月。小溲點滴不通。某婦科進以鮮生地龍膽草青麟丸等寒涼之品。小溲祕之更甚。已有三日。余診其脈。沉細而瀆。少

腹脹痛。余曰。此胞阻也。被寒涼凝滯膀胱。無陽不能化氣。卽出。卽將葱二斤。煎水熨洗少腹。略能小便。卽進五苓散。桂枝一錢。猪苓赤苓各二錢。澤瀉二錢。白朮二錢。研粗末。煎沸濾清飲之。仍不能通暢。而少腹痛勢稍減。將前方去桂枝易肉桂一錢。服法依前。服後而小便大暢而愈。

常熟花園浜王姓婦。妊娠九月。胞漿水已破之後。腹痛漿水瀝盡。小洩不通。已有三日。少腹不動。穩婆謂胎死腹中。或欲試手法。或欲下死胎方。邀余診之。見產婦神情恬淡。並無所苦。唇舌均紅。使穩婆按其少腹。溫而不寒。脈來流利。軟而無力。診畢。穩婆問腹中小兒能保全否。余曰。腹中小兒。酣睡味醒。穩婆曰。何以不動。余曰。因睡而未醒。故不動也。主人曰。腹痛三日。小便不通。小孩不動。恐胎已死矣。請先生一斷之。余曰。此名胎壓膀胱。此方書所不載。必定是負重。或跌仆而損胎元。又因坐蓐太早。氣掙於下。胞壓膀胱。小洩不能出。洩阻而脹。兼之胎元下墜。兩相擠軋。不能轉動。如果子死。當唇紅

舌黑。少脹作冷。按脈未離經。未至臨產之時。胎元斷斷不死。卽問產婦。曾否有負重跌仆之事。婦曰。三日前因有安息香兩支在地。俯之不能拾。乃跪而拾之。起時胞漿已破。余曰。胞壓膀胱無疑矣。可先將燈草刺鼻中。令產婦噴嚏。嚏則肺氣開。上竅通則下竅泄。而小便可通。再吸洋煙三筒。將其胎提起。以免擠軋子門。小便通後。可讓出地面。使小兒可以轉身。臨盆卽不難矣。問服何藥。余曰。不須服藥。主人曰。可服催生藥否。余乃進以胃苓湯。加蘇梗。利水行氣而已。噴嚏之後。吸洋煙三筒。果然小便通暢。藥將沾唇。小兒已下矣。

常熟大東門外萬興祥茶葉鋪執事。胡少田先生之妻。素未生育。至三十九歲。始有娠。懷孕七月。始則咳嗽。繼則下痢。初則不以爲意。臨產頗難。產下未育。心中悒鬱。肝木乘脾。咳嗽下痢更甚。邀余診之。余曰。雖云新產。年近四旬。氣血本弱。况產前咳嗽。本屬土不生金。子反盜母氣。脾胃反虛。清氣下陷。轉而爲痢。咳痢已有三月。又兼新產。名曰重虛。若多服益母草等味。再破

血傷陰。內經所謂損其不足。且有無虛虛無盛盛之戒。余進以十全大補湯。去桂枝。加枸杞菟絲杜仲飴糖等味。衆曰。產後忌補。斷斷不可。余曰。放心服之。如有差失。余任其咎。服後當夜咳痢均減。明日再進。其姑曰。產後補劑。勝於鳩毒。必致殞命。余謂少田曰。既令堂不信。君可另請婦科開方。暗中仍服補劑。免得婦女多言。使產婦吃驚。同道董明剛曰。此計甚善。余卽回城。託明剛依計而行。余回寓。使人贈少田人參二枝。若不服人參。下焦之氣。不能固攝。少田卽煎人參與服。其母知之。執持不可。後將達生編與衆人閱看。產後並不忌補。其母始信。服後安然無恙。後再服數劑。咳痢均愈。

昭文幕友張筱洲之妻。生產正在酷暑。新產兩朝。猝然神昏顛倒。言語錯亂。余診之。見喘息氣粗。脈洪數極大。汗出如珠。口渴煩躁。余曰。此乃熱中於裏。逼陰外出而大汗。仲景白虎症也。卽將蓆置地上。令產婦臥於地。用盆置井水於傍。使其安臥片時。神識漸清。氣亦漸平。脈亦稍靜。卽擬仲景白虎

合竹皮竹葉之意。進以石膏、竹茹、竹葉、知母、白薇、鮮石斛、益元散、綠豆衣、丹皮、花粉、青荷葉、西瓜翠衣、甘蔗汁、大隊甘寒之品。服後至晡。神清熱減。仍令其移臥於牀。進以稀粥。仍以甘涼之劑調理而愈。

辛卯冬。余至五渠夏宅診脈。回至舟中。有陸二官。余之僕也。其妻追至舟中云。家中姪媳病重。欲邀余診。余因有別事。不能逗留。陸二夫婦匆匆回家。余亦反掉。已去里許。余在舟中忖之。看陸二夫婦驚惶失色。必病勢危急。若袖手不救。於心何忍。卽停舟步行至其家。見其家中聚集多人。病人勢已臨危。余卽問其病情。因孖胎難產。去血過多。氣脫矣。余卽診其脈已絕。目瞪直視。牙關緊閉。用火刀撬之。舌縮色白。面色如紙。肢體俱冷。余卽將艾葉灸其小足指外。兩炷。稍能伸縮。余曰。未必竟死。此乃氣隨血脫也。若不急救。三四時氣必絕矣。用黃芪四兩。當歸二兩。煨牡蠣四兩。炒棗仁三兩。煨龍骨一兩。炙甘草三錢。炒淮麥三錢。紅棗三兩。炒白芍六錢。桂枝錢半。桂圓肉二兩。

茯神二兩。黨參四兩。給其藥資一元。將大罐煎沸。以氣薰其鼻。頻頻灌之。再添水煎。再薰再灌。共服十餘碗。肢體漸漸轉熱。至四更始醒。

常熟塔前高姓婦。十一月二十九日生產。至十二月朔。下血甚多。請王姓醫治之。進以當歸杏仁冬瓜子等。又方加以肉桂。初五邀余診之。脈芤而無力。面色晄白。唇舌俱白。毫無華色。神氣疲乏已極。口脣掣動。余診之曰。此氣隨血脫。血虛則內風煽動。宜遵血脫先固氣之法。非大補不可。立方黨參一兩。黃芪一兩。枸杞一兩。當歸三錢。白芍二錢。桂枝五分。炙草六分。龍骨三錢。棗仁五錢。茯神三錢。紅棗十枚。桂圓肉十粒。服後神氣略清。精神漸振。照方減半。又服二劑。惟小便自遺。大便不更。此係神氣不固。血液虧損。津液不能敷布大腸。又改方淡菴蓉三錢。杜仲三錢。杞子五錢。潼沙苑三錢。白芍二錢。菟絲子三錢。蒲黃炒阿膠二錢。紅棗五枚。桂圓肉六枚。服後小便遺止。大便已通。後服和營理氣。調養肝腎而痊。俗云產後忌補。不可執一而論也。

徐漢泉妻新產後。小洩瀉少而艱難。邀數醫治之。俱罔效。後請江陰周姓醫。進以五苓加通草瞿麥之類。服後小洩頻數而極少。一夜數十行。出如箭速。而子門如烙。熱痛非常。發熱口渴煩躁。病勢甚危。邀余診之。余曰。仲景云。產後小洩少者。無血也。若以淡滲若洩。更傷其陰液。則小便更少。而熱更甚。忽養其陰。自然洩長而虛陽亦潛。進復脈增液合導赤湯法。生地一兩。麥冬五錢。玄參四錢。阿膠三錢。天冬二錢。石斛五錢。生草梢一錢。牡蠣一兩。生龜版一兩。西洋參二錢。煎濃汁飲之。小洩漸止。煩躁發熱漸安。服三劑。熱痛已平。小洩清長。後服甘涼鹹寒十餘劑而愈。

經帶

常熟旱北門吳姓女。十九歲。經停四月餘。飲食如常。脈亦不瀉。肌肉不削。不內熱。不咳嗽。其父母恐停經而成乾血。余曰。飲食如常。肌肉不削。少腹脹硬。此乃水寒與血。互相膠結於血室之中。若不趁其正氣旺時攻之。待至

日久正虛難以再攻。卽以瞿麥、桃仁、紅花之類。罔效。再以歸尾、紅花、肉桂、山稜、莪朮、延胡、五靈、炮薑、桃仁等品。服百餘劑。不效。自六月至十月。小腹漸硬。諸藥不效。至十二月。余適回孟河度歲。請某姓婦科。服以四物等湯。恐其血虛。經不能濟。先養其血。少腹更硬。又延某醫治之。曰。被余某破血太甚。急宜補之。進以四君補中益氣之類。少腹仍然。二月余回琴。仍邀余診。小腹脹硬。令其母捫之。其冷如冰。痛不可言。肢冷面青。余曰。水與血互結血室。下之亦死。不下亦死。既是血虛。豈有服山稜、莪朮、歸尾、桃仁等百餘劑而不死者耶。余卽進桃核承氣湯。大黃四錢。桂枝一錢。炙草一錢。芒硝二錢。桃仁三錢。陳酒和水煎。分三次服。初次服下。小便中卽下黃膩水。連服三次。連下三次。腹痛稍緩。神氣極疲。少腹稍軟。明晨余恐其過下氣脫。卽進以活血理氣之品。血仍不下。腹痛更甚。再進以桃仁承氣湯。送下抵當丸。不料腹痛欲厥。卽以艾葉煎湯。洗熨少腹。下黃膩水更多。又下紫血塊數枚。而痛卽止。兩月後。信

水如常。至九月出閣。強健如昔。余讀金匱仲聖有瘀血在少腹。或水與血結於血室。大黃甘遂湯。下瘀血湯。抵當湯。皆非大黃不可。因大黃是血分之下藥也。此症若不遵古訓。而不用大黃。雖山稜莪朮千劑。亦徒然耳。所以仲景之書。不可不讀也。

常熟東鄉某姓婦。就寓診云。帶下黃膩水。終日淋漓甚多。且臭穢不可近。診後椅墊皆溼。腥臭不堪。余思五臟五帶。黃帶屬脾經溼熱。清氣下陷。不能固攝。然病已半年。亦難速效。姑擬補中益氣法。原方去當歸。加菟絲龍骨牡蠣。使其清氣上升。脾有約束。以菟絲龍骨牡蠣堵截其下焦。亦杜撰不經之見。不料服三劑。病已霍然。余亦不解其妙。